

# Ke Surat ni Pablo Riyà te Ki Filemon

---

<sup>1</sup> Siaken ini se edsurat ne si Pablo elin si Timoteo ke suled tew te ebperetiyaya. Ini ad te bilengguan su atag dut te kebpsabut ku mekeatag ki Hisu Kristu.

Edsuratan dey sikuna, Filemon, ne sepekat ne igkelimù dey ne ruma rey dema te ebpesabut mekeatag ki Hisus, <sup>2</sup> wey riyà dema te ki Epiya ne senge etew ne meritan ne suled tew te ebperetiyaya, wey ki Arkipus dema ne ruma tew te ebpekibunù ki Setanas ke datù te pekaid, wey taman dut te langun ne mibperetiyaya ne egkevurun keniyàn te baley nu.

<sup>3</sup> Iyan ku kiyug ne egkeheram niyu te tavang wey kelinew ne itungan ne riyà ebpuun te Eleteala ne Amey tew wey si Hisu Kristu ke Kerenan tew.

## **Ini ne Mekeatag te Kedsarig ni Filemon ki Hisus wey ke limù din dut te langun ne Mibperetiyaya**

<sup>4</sup> Filemon, uman a ebpengeningeni te Eleteala ne idragkes ku sikuna, ne ibpeselamat ku rema kandin mekeatag kenikew. <sup>5</sup> Su tatap ne egkerineg ku ke limù nu rut te langun ne mibperetiyaya keniyàn wey ke kedsarig nu ki Hisu Kristu ke Kerenan tew. <sup>6</sup> Iyan ku kebpengeningeni kenikew ne ke kegkevagkes te hinawa niyu te menge mibperetiyaya se ebpeiseg apey egkeumani ke nesebutan niyu dut te langun ne keupianan tew ne kayi ebpuun te kebpekidseveka tew ki Hisu Kristu. <sup>7</sup> Su ketà te nerineg ku mekeatag te limù nu, Filemon, dut te menge ruma nu, ne nehalew a nevenar wey ke hinawa ku ne neegaran su midtihel nu kun ke hinawa rut te langun ne mibperetiyaya.

## **Ke Pemuyù ni Pablo diyà te ki Filemon Mekeatag ki Unisimus**

<sup>8</sup> Na Filemon, duen ini ignganey ku kenikew. Ne kenà a egkealang-alang te edsuhù kenikew te ed-ulaula ke engkey se dait ne ulaula su atag dut te ketehel ku te kedserihan a ni Hisu Kristu, <sup>9</sup> ugaid ne ignganey ku

rà su sabap te rekela ne limu ku kenikew. Ne lukes ad dema ne guntaani ne ini a te bilengguan atag dut te kebpenuru ku mekeatag ki Hisu Kristu. <sup>10</sup>Tembu be ini se ignganey ku kenikew ne mekeatag ki Unisimus ne iring te anak ku. Uya, iring en sikandin te tuney ne anak ku su ke peretiyaya rin ne sabap te penuru ku gewii ku ini te bilengguan. <sup>11</sup>Rengan ne si Unisimus ini ne iring te wara pantag din kenikew, ugaid ne gunteani ve ne duen en pantag din uman kenikew wey kediey.

<sup>12</sup>Na ibpeuli ku pe be sikandin diya te kenikew misan merasey en te hinawa ku se kebpekedsuwey rey. <sup>13</sup>Egkesuat a perem ne kayi ebpekeubpa sikandin te kedi su apey a rin egketevangi timbang sikuna taman te ini e pa te bilengguan su mekeatag te kebpesabut ku rut te Meupiya ne Tudtul. <sup>14</sup>Ugaid ne kena ku ve ini ed-ul-ulaan ke kena kenian ded ebpekepuun te kenikew su kena ku ebpengunaan ke hinawa nu. Su iyan meupiya ne egenat en te keputian te atey nu se kedtavang nu kedi.

<sup>15</sup>Kalu ke iyan kinepekeawa ni Unisimus kenian te kenikew te mehaan da ne ketau red te Eleteala su apey edlived sikandin kenian te kenikew ne egkekemuney nu red su editireneb en. <sup>16</sup>Na guntaani ve ne kena uripen nu ra de duen sikandin su suled nu en sabap dut te peretiyaya nu ne igkelimu nu. Ne dekelà ku en sikandin te hinawa! Ugaid ne iyan ka pe be edlewanan se kena uripen nu ra su suled nu en dema te ebperetiyaya te Kerenan tew ne si Hisus!

<sup>17</sup>Na engketà be ara embiya benar pa ne edsuled ki, ne telimaa nu sikandin iring te siaken ded. <sup>18</sup>Ne embiya ruen meraat ne mid-ulaula rin kenikew, etawa ruen utang din kenikew, ne ed-ekuwen ku en. <sup>19</sup>Na intengi nu ini se surat ku ne egkahi te: Siak imbe si Pablo se ebayad kenikew. Kalu ke wara atag din te kebpetanud ku kenikew te ruen utang nu kediey su embiya kena kayi ebpuun te kediey ne penuru ne wara nu merineg ke kebpeleyu te Eleteala te menge etew. <sup>20</sup>Tembu be, suled ku, kelimulimu be ne ul-ulaa nu ini kedi su neseveka ki ki Hisu Kristu ke Kerenan tew. Helawa nu ke hinawa ku su edsusuled kiyu te kebperetiyaya tew kandin.

<sup>21</sup>Ne kena eduwaruwa se hinawa ku kayi te kedsurati ku kenikew ne edumaan nu ini se mibuyu ku kenikew, ne netuenan ku rema se kena ara da se ignganey ku kenikew se ed-ul-ulaan nu ugaid ne lavi pa maa. <sup>22</sup>Seveka maa ne kelimulimu ne penehana ke en te edetengan ku su dekelà se penerengan ku te egketavak te Eleteala ke pengeningeni niyu mekeatag kedi ne ebpekeliyu a kayi apey a ebpekelived kenian te keniyu.

<sup>23</sup>Si Ipapas ini se duma ku kayi te bilengguan se ebpenginginsa mekeatag te sikiyu kenian, su nevilangu sikandin dema sabap dut te kedsarig din ki Hisu Kristu. <sup>24</sup>Elin si Marcos, si Aristarkus, si Demas,

wey si Lucas ne minge ruma ku te ebpesabut te lalag te Eleteala ne ebpenginginsà dan dema te sikiyu kenian.

<sup>25</sup>Iyan ku kiyug ne langun niyu ne ebpekeheram te tavang ne riyà ebpuun te Kerenan tew ne si Hisu Kristu.

Arà dà taman.

*Pablo*